

30.07.2026

UKA2026/411

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Kalaallit Nunaanni aalajangersimasumik najugaqartunut nunatta iluani silaannakkut angalanerup akikinnerulersinneqarnissaa pillugu aaqqissuussinissamik Naalakkersuisut suliaqarlutik kingusinnerpaamik UPA2027-mi Inatsisartunut saqqummiussinissaannik peqquneqassasut Inatsisartut aalajangiiffigisassaattut siunnersuut.

Aaqqissuussinissamut siunnersuummi ilaatigut najugaqarneq tunngavigalugu immikkut akigititat imaluunniit angalanermut tapiissutit, isorliunerusuni imaluunniit silaannakkut angallannikkut periarfissakinnerusuni najugaqartunut immikkut aaqqiissutit, ukiumut angalanerit tapiiffigineqarsinnaasut amerlassusissaat, aningaasalersuinissamut periarfissat kiisalu aaqqissuussinerup aningaasaqarnikkut, allaffissornikkut inuiaqatigiinnullu kingunerisassai nalilersorneqassapput.

(Inatsisartunut ilaasortaq Mette Arge-Hammeken, Naleraq)

Tunngavilersuut

Kalaallit Nunaanni illoqarfiit nunaqarfiillu amerlanersaat aqqusinikkut imminnut attaveqanngillat. Taamaattumik nunatta iluani angalaniarnermi silaannakkut angalanerup innuttaasunut amerlasuunut toqqagassaannaanani pisariaqartuuvoq.

Taamaakkaluartoq nunatta iluani angalanerup akia innuttaasunut amerlasuunut qaffasippallaarpoq. Tamanna ilaqtanik qanigisanillu tikeraarnissamut, ilinniarnermut, inuussutissarsiornermut, peqqinnissaqarfimmut, kulturikkut timersornikkullu aaqqissuussinernut peqataanissamut kiisalu nunatta iluani takornariarsinnaanermut periarfissanik killiliisarpoq.

Pingaartumik isorliunerusuni imaluunniit silaannakkut angallannikkut periarfissakinnerusuni najugaqartut angalanerup aningaasartuuteqartarnerat annertunerusarpoq, angalanerillu amerlanertigut arlaleriarluni timmisartornertaqartarlutik. Taamaattumik innuttaasut sumi najugaqarnerat angalasinnaanermut periarfissanut annertooujussuarmik sunniuteqartarpoq. Kalaallit Nunaanni aalajangersimasumik najugaqarneq innuttaasut nunaminni angalasinnaanerannut aporfiusariaqanngilaq. Taamaattumik aaqqissuussineq innuttaasut Kalaallit Nunaanni najugaqavissut pitsaaneruseq angalasinnaanissaannut periarfissiisq sulissutigineqartariaqarpoq, pisariaqartitsinerusullu immikkut isiginiarneqarlutik.

Islandimi Loftbrú¹ aaqqissuussineq aqquutigalugu nunaqarfinni najugaqartut nunap iluani timmisartumik angalanerminni billetsip akiata 40 %-ianik tapiiffigineqartarput. Tapiissutit ukiumut aalajangersimasumik amerlassusilinnik angalanernut atuupput.

USA-mi Essential Air Service² aqquutigalugu naalagaaffik isorliunerusuni timmisartuussinernut tapiissuteqartarpoq, taamaalilluni innuttaasut pingaarutilimmik attaveqaannarnissaat qulakkeerneqarluni.

Misilittakkat taakku takutippaat nunani isorliunerusuni najugaqartut immikkut aaqqissuussivigineqarnissaat naliginnaasumik atorneqartoq, inuiaqatigiinnullu iluaqutaasoq. Kalaallit Nunaanni immikkut akigititanik aaqqissuussinerit pioreerput. Air Greenland meeqqanut, inuusuttunut, utoqqarnut ilaqutariinnullu immikkut akigititaqarpoq.

¹ <https://island.is/loftbru>

² <https://www.transportation.gov/policy/aviation-policy/small-community-rural-air-service/essential-air-service>

Ilinniarnermut, kulturimut timersornermullu atatillugu aamma immikkut aaqqissuussisoqartarpoq.

Naalakkersuisut § 37³ naapertorlugu apeqqueteqaammut nr. 118/2026-mut akissumminni uppersarparaat immikkut akikilliliisarnermik aaqqissuussineq inatsisitigut periarfissaqartoq, kisiannili najugaqavissunut aaqqissuussinerup qanoq akeqarnissaa Naalakkersuisunit sulii naatsorsorneqarsimannigitsaq. Aammattaaq Naalakkersuisut paasissutissiippat najugaqavissunut immikkut aaqqissuussisoqassappat aningaasaliissutit pisariaqartinneqarsinnaasut aammalu isumaqatigiissutit allanngortinneqarsinnaasut. Tamanna takutippaa immikkut aaqqissuussisoqarsinnaanera Naalakkersuisut namminneq periarfissatut isigigaa.

Siunnersuuttip siunertarinngilaa procentimik aalajangersimasumik aalajangiinissaq imaluunniit Islandimi aaqqissuussinerup assilinissaa. Siunertarineqarpoq Naalakkersuisut Kalaallit Nunaanni pissutsinut naleqqussakkamik aaqqissuussinissamik saqqummiussissasut. Nalilersorneqarsinnaasut makkuupput:

- najugaqavissunut tamanut immikkut akigititat,
- isorliunerusuni imaluunniit angallannikkut periarfissakinnerusuni najugaqartunut immikkut aaqqissuussineq,
- ukiumut aalajangersimasumik amerlassusilinnik angalanernut tapiissutit,
- imaluunniit nunatsinni pissutsinut naleqqunnerpaamik allamik aaqqissuussineq.

Taamaalilluni Inatsisartut paasissutissanik naammattunik tunngaveqarlutik aaqqissuussinissamik aalajangiisinnalissapput.

Pisortanut aningaasaqarnikkut allaffissornikkullu kingunerisassat

Naalakkersuisut Kalaallit Nunaanni aalajangersimasumik najugaqartunut nunatta iluani silaannakkut angalanerup akikinnerulersinnissaanut aaqqissuussinissamik siunnersuummik suliaqarlutillu saqqummiussissapput. Suliaq aaqqissuussinerit assigiinngitsut misissorneqarnerannik, aningaasaqarnikkut kingunerisassat naatsorsorneqarnerannik, aningaasalersuinissamut periarfissat nalilersorneqarnerannik kiisalu tusarniaassuteqarnermik allaffissornikkullu suliarinninnermik imaqaasasooq naatsorsuutigineqarpoq. Siunnersuummik suliaqarnissaq allaffissornikkut AC-tut sulinermi ukioq-ataatsip affaanik atuiffiussasooq nalilerneqarpoq, tassa 250.000 kr.-inik.

Aaqqissuussinerup atuutilersinneqarnera kingornalu ingerlanneqarnera pisortanut aningaasartuuteqarnerulersitsissaaq. Naalakkersuisut § 37⁴ naapertorlugu nr. 118/2026-mut akissumminni uppersarparaat aningaasartuutissat sulii naatsorsorneqarsimannigitsut. Taamaattumik siunnersuummi Naalakkersuisut aaqqissuussinerit assigiinngitsut aningaasartuutaat aammalu aningaasalersorneqarsinnaanerat ilanngullugit Inatsisartunut saqqummiutissavaat.

Namminersorlutik inuussutissarsiortunut aningaasaqarnikkut allaffissornikkullu kingunerisassat

³ https://ina.gl/media/tgzjzprg/118_2026_billigere_billetter_for_herboende_mettah_akissut.pdf

⁴ https://ina.gl/media/tgzjzprg/118_2026_billigere_billetter_for_herboende_mettah_akissut.pdf

Naalakkersuisut § 37⁵ naapertorlugu paasissutissiipput aaqqissuussineq Nunap Karsianit aningaasalersorneqassappat inuussutissarsiortunut toqqaannartumik kingunerisassat annikitsuussasut. Ingerlatseqatigiiffiilli namminneq tapiissuteqartussanngorpata tamanna kaaviiartitsinermut sunniuteqarsinnaavoq.

Innuttaasut amerlanerusut nunatta iluani angalasalernerat inuussutissarsiornermut, takornariaqarnermut kiisalu sullissinermut pitsaasumik sunniuteqarnissaa naatsorsuutigineqarpoq.

Innuttaasunut aningaasaqarnikkut allaffissornikkullu kingunerisassat

Siunnersuutip siunertaraa Kalaallit Nunaanni aalajangersimasumik najugaqartut nunatta iluani angalanerminni akikinnerusumik periarfissaqalernissaat.

Naalakkersuisut naliliipput najugaqavissuunerup uppersararneqarnissaa saniatigut innuttaasunut allaffissornikkut kingunerisassat annikitsuussasut.

Aaqqissuussineq innuttaasut amerlanerusut ilaqqutaminnik tikeraarsinnaanerannik, nunatsinni angalasinnaanerannik kiisalu kulturikkut, timersornikkut inuussutissarsiornikkullu peqataasarnerannik pitsaanerulersitsisinnaavoq.

⁵ https://ina.gl/media/tgzjzprg/118_2026_billigere_billetter_for_herboende_mettah_akissut.pdf